



NAUČNA RASPRAVA

SUVERENITET DRŽAVE BOSNE I HERCEGOVINE

U povodu obilježavanja 1. marta - Dana nezavisnosti Bosne i Hercegovine, jednog od najznačajnijih datuma u historiji Bosne i Hercegovine, pozivamo Vas da prisustvujete naučnoj raspravi ***Suverenitet države Bosne i Hercegovine*** koja će se u organizaciji Redakcije ***Pregleda: časopisa za društvena pitanja*** održati u četvrtak 25. februara 2016. godine u prostorijama Univerziteta u Sarajevu, sa početkom u 11,00 sati.

Pozivamo predstavnike svih javnih univerziteta u Bosni Hercegovini da učestvuju u radu ovog skupa gdje će se kroz otvoren, naučno-argumentiran dijalog i razmjenu iskustava dati doprinos u analiziranju i problematiziranju suvereniteta države Bosne i Hercegovine sa političkog, sociološkog, filozofskog, ekonomskog, obrazovnog, kulturološkog, religijskog i drugih aspekata.

Nadamo se da ćete svojim prisustvom uveličati ovaj skup.

S poštovanjem!

REKTOR

Prof. dr. Muharem Avdispahić, dr. h. c.



PREGLED

ČASOPIS ZA DRUŠTVENA PITANJA

POZIV ZA SUDJELOVANJE

u naučnoj raspravi:

SUVERENITET DRŽAVE BOSNE I HERCEGOVINE

Redakcija *Pregleda: časopisa za društvena pitanja* u povodu obilježavanja 1. marta - Dana nezavisnosti Bosne i Hercegovine, organizira naučnu raspravu o temi *Suverenitet države Bosne i Hercegovine* koja će se održati 25. februara 2016. godine u prostorijama Univerziteta u Sarajevu, sa početkom u 11,00 sati.

Naš je cilj da sa naučnog stanovišta progovorimo o *suverenitetu* države Bosne i Hercegovine dvadeset godina poslije potpisivanja mirovnog sporazuma. Šta je danas državni suverenitet? Kako se država Bosna i Hercegovina može razumjeti po pitanju suvereniteta koji je poslije 1995. "čudno" razdijeljen i transformiran kroz etničku podjelu državne teritorije na dva entiteta? Da li je postdejtonsko "topljenje" suvereniteta dovelo državu u veliku opasnost u kakvoj nije bila zadnjih pedeset godina? U takvoj državi danas ne postoji jedinstven politički sistem, sistem obrazovanja, sistem policije, zdravstvene zaštite, državne kulturne politike, jedinstvenog odnosa prema državi i tim redom.

Nadamo se da dijelimo Vaše mišljenje o važnosti ovoga pitanja za našu budućnost. Naš razgovor bi trebao doprinijeti razumijevanju procesa u kojem se nalazimo u ovome povijesnom trenutku. Država je pravni okvir i vladavina zakona koji nam osigurava slobodu i građansko dostojanstvo. Stoga je pitanje njezinog suvereniteta od izuzetne važnosti za sve nas.

Namjera Univerziteta u Sarajevu i Redakcije časopisa *Pregled* je da izlaganja učini dostupnim akademskoj i široj zajednici kroz objavljivanje u narednom broju časopisa. Časopis *Pregled* je jedan od najstarijih časopisa u Bosni i Hercegovini koji, sa kraćim i dužim prekidima, izlazi od 1910. godine. Časopis afirmira stvaralaštvo naučnih radnika Univerziteta u Sarajevu kao i drugih istraživača iz oblasti društvenih i humanističkih nauka iz naše zemlje i inostranstva. Prioritet se ogleda u naučnom pristupu u elaboraciji savremenih socijalnih, ekonomskih, pravno-političkih procesa u Bosni i Hercegovini ali i svijetu. Časopis pruža mogućnost naučnoj, književnoj, kulturnoj, društvenoj i ekonomskoj javnosti da prezentira bosanskohercegovačke i evropske kulturnohistorijske tokove i protivrječnosti.

Pozivamo nastavnike i saradnike - predstavnike svih javnih univerziteta u Bosni Hercegovini da pošalju sažetke svojih naučnih i stručnih izlaganja koji problematiziraju ovu temu sa političkog, sociološkog, filozofskog, ekonomskog, obrazovnog, kulturološkog, religijskog i drugih aspekata. Sažetke izlaganja pošaljite na e-mail adresu izdavacka.djelatnost@unsa.ba najkasnije do 30. januara 2016. godine (kontakt osoba: Fuada Muslić, tel: 033/221-946).

Recenzirana izlaganja će biti objavljena u časopisu *Pregled* broj 1, 2016.

Na web stranici www.pregled.unsa.ba su dostupne informacije o časopisu, date su upute autorima, te je omogućeno online pretraživanje i praćenje najnovijih objavljenih članaka.

Vašim sudjelovanjem u radu ovog skupa ukazali biste nam čast i zadovoljstvo.

S poštovanjem!

GLAVNI I ODGOVORNI UREDNIK *PREGLEDA*

Prof. dr. Senadin Lavić